

Gekruuts

Twieë boere troffe zig.

Zeët d'r inne teëge den angere: "Ich han vurrig joar ing hoon mi tinne papegaai gekruuts!"

"Enne? Is 't gelonge?" vrieëgt d'r angere.boer.

"Dat zou me dinke. Es die hoon ee ei had gelag, kakelt ze neet mieë, mar ze kunt 't mig zage!"

Jan Halmans

D`r Wintjer

Me deed d'r veuël uëver kalle

En neet jieëdereë deed 't bevalle

Mer de wintjer va dit joar

Doa kump ginne mit kloar

Reëge, gevruur, doeëj,sneij, ee op en neer

Doe wieërs gaar va dit onbereakenbare weer

Gieëkerinne head waal verkoudheid of griep

Dizze wintjer kin alleen mer geniep

Mer al doeërd d'r wintjer lank

't vuurjoar sjteed al i-de gank

Dooch dich werm aa en gank droet

Neet zitte blieve in de boet

Zurg ummer vuur ee good gemood

Da kump alles weer good.

Jan van Haaf

Dinke aan wat-ste waal hubs

Vier dinke dékker aan wat vier neet hubbe es aan wat vier waal hubbe.

Mér of dat 't noe weërd is om ummer mér uëver te dubbe?

Blie zun mit wat-ste hubs of wat dich is gegeëve,

Is toch veuël belangrieker om te genete van 't leëve!

Dus bis bliej mit de luuj en de dinger in dien besjtoan,

Went om inne daag neet te genete is 't leëve veuël te flot gedoan!

Ron Logister.

Euft.

't Euft ding me druëge achter i de oave

Ich moosj waal es de oave leag hoale

Mer ding mich zelf nieks te kort

Vuur mich woar 't inne sjport

Eesj ging 't nuëdige bij mich noa binne

Vuurdat ich doa a ging beginne

Es ich da woar vol geëte

Dong ich mien tesje neet vergeate

Es de boerin os op euftvla trakterde

Ich 't ieëjs in de riej masjeerde.

Euft woert va eppel en peare gemak

De vla doa-va hou ee good gesjmak

Ooch ding me zelf zeem maake

Doa-op vrujde vieer os, sjnaake
Op de mert verkoch me euft en zeem
Me woar da der ganse daag va heem
Ooch woert hanjel in Oake en Luuk gedoan
Dat woar hel nuëdig mit dat ermuëdig besjtoa

Jan van Haaf

De Sjilder

Heë deeg witte, verve sjtrieke
Moeëre marmere en duëre kemme
Went heë ee moal bezig woar
Woar heë neet mieë te remme
Heë kos al versjteëke
Mit plamuur en kneedbaar hoot
Doe woerd heë krank
't Woar heuëm gaar neet good
Heë heel 't neet mieë vol
En is oetintelich gezjwich
Noe ligkt heë op 't sjoof
Mit 'n oetgesjtrieëke gezich

Wiel Roeselers

De wintjer is in 't landj

De bueëm zint kaal de blaar vleege nog rondj,
't Is èè sjtök kouwer, mer waal gezondj,
Zit vueèrzichtig, doeèt uch neet vergisse,
Want jas en sjaal kènt me echt neet misse,
Diej frieèsje loeëf deëd inne minsj good,
Dus loat de auto sjoan en goat te voot,
Hoal deep oam, en vult ueër longe,
Zèk èns iejrlèk höbt g`r dat neet lekker gevonge,

Es g`r sjmöriges opsjtoat en kikt noa boeète,
Doeër de iejsblome op de roeète,
En sjoat te razele van de kou,
Lèkt uch dan weer gouw,
Truk in bèd onger de deake,
En doeëd uch nog èè urke versjteake

Viejr motte weer effe winne aan de kou,
Dat geet in de regel vriej gouw,
Mer biste aan de kou gewènt,
Wat neet iejdereë zègge kènt,
Is't weer vueërjoar en löps oane jas,
't lejs noa de miejterkast
En kiks noa 't verbroeëk van gas,
Dan bèste bliej es't wermer wueërd,
De aafreakening krit g`r nog gesjtueërd,

Jan Theunissen

Dreuvig landj

Peul water sjtond
In de weije
Kiek 't reet
In de windj weije
De grubbe sjtond
Vol mit water
Hie en doa huërs-te
Eënje gesjnater
De welt trikt aan de sjtieëvele
Went me doeër geveldj lupt
Wie soldoate neëve ee
De wietjes, frisj gekupt
't Dreuvige landj
't Liekt te griene
Went in der miezel
Vale sjtroale sjiene

Wiel Roeselers

Broem – broem

Jantje zag op sjoeël ummer broem-broem!
Zieng juffrouw zag teëge hum: “Jantje nog inne kieër en doe gees in d;r hook!”
“Broem – broem!” zeët jantje weer.
“Jantje, in der hook!” reupt de juf.
“Ich kan neet”, zeët Jantje.
“Miene bezien is op!”

Jan Halmans

De Wintjer

Ooch al is de wintjer duuster en koud,
Dan komt g`r mit inne kilo of tiejn zout,
De wintjer waal doeèr, oane probleme,
En doeèd de kans op valle verkleene.

Jan Theunissen

Nuuj Joar

'n Joar sjteet weer op 't punt om te goan,
De tied blief noe eenmaal neet sjtil sjoan.
Ooch al zouwe v`r dat waal ins geer wille,
Dat hove v`r os joa neet te vertille.

Mer 'n nuuj joar sjteet op 't punt van beginne,
'n nuje periode in 't leëve, kloar om te ontginne.
Wat zouw os dat kommende joar goan bringe?

Zouwe v'r 't ganze joar van vruid kinnen zinge?

Allemaal neet te beantwoerde vroage welle in os op,
Allemaal goeije vuurnummes zitte in ozze kop!
Loate v'r 't mer allemaal op os afkomme,
En hope dat os dat nuje joar good zal bekomme!

Ron Logister

't Leëve is besjieëte

Wens-te geboare wurs
Hauwe ze dich oppe vot
Begins-te dan te keëke
Lache ze zich kapot

Doe wurs gewessje
En gesjroebt
En has intussje
In de koep gepoept

Ze pungele dich get aa
En drieëje dich in ene dook
Wurs de kamer rondj gedrage
Bis in jieëdere hook

Ummer bie 'n anger tant
Teëge boeëzem of oppe sjoeët
Wurs gepungeld en geduujd
Veuls dich inne erme kloeët

Al flot has-te in de gate
De maneer om dich droet te riete
Is hieël flot en mit behei
Der luijer vol te sjiete

Doe bis opgeluch
Gans effe has-te rau
Mer dat verengerd dan
Toch nog gans gauw

De ganse famielje kumt kieke
Went jieëderree mot 't wete
Of dats-te pratsj of
Ene richzige kuttel has gesjete

Wies-te ooch ummer geprieëze woeërst
Op ins mos-te in de hook sjtoan
Omdats-te, wie gewind
't in de boks has gedoan

't Mot op 'n putje in volle glorie
In de kamer mit dien bloeëte bakke

De ganse famielje der omheër
Zoeë kint toch nieëmes ordentlich kakke

Noaheër mos-te noa 't huuske
Op zonne pot hoeëg van de grondj
Doe wiebbels get op der bril
En zaks mit de vot in de sjtrontj
Wurs-te get ouwer, gees wirke
Kries-te al op diene nek
Went es jonge keel
Begins-te in der drek

Zoeë sjravels doe joare
Has dich de ruk uëver gerieëte
Bis dats-te noa vieftig joar mirks
Dien pensijoeën is besjieëte

In de kliniek dien litste joare
Me dinkt; deë makt 't toch neet mit
Mer me mirkt verdomde good
Went me in ziene ege sjtront zit

Zoeë kums-te drachter
Wie 't sjpreëkwoeërd is ontsjtange
Dat al ieëwe wurdt oetgesjproake
Zoeëlang de miensj had besjtange
Ich hub 't ooch al begrieëpe
Egelik van 't begin al gewete
Wens-te 't good bekieks
Is 't ganse leëve besjete

Wiel Roeselers

Ee kèndj aagaeve

In de twintiger joare woar 't nog verplich, dat went me ee kèndj bij de gemeente ging aagaeve, dat dat kèndj aan de ambtenaar van de burgelijke sjtandj moeësj waere getuuënd.

Ooch moeësj me dan eene getuuëge mètbrènge. Luuk Hieërings ging op eene gòwwe daag ziej drijde kèndj, ee maedje, aagaeve. Es getuuëge hauw hae zich Hoebert va Pieëter Antoeëne (Hubert Daemen) mètgenòmme.

Wiej me op 't gemeentehoeës vaerdig woar ging me noa 't café va Graetje Gieëllisse, òm zich eene op de lamp te sjödde. Dat woar noew eemoal tradisie. 't Kèndj woeërd op eene sjtool gelag en me leij zich 't beer en ooch de nuuëdige dröpkes good sjmaake. Noa ènnige oeëre begòs 't kèndj ee bietje te mieëtsje òmdat 't hõnger kreeg. De nuuje sjtolse vader en ooch de getuuëge hauwe aevel nog geene zin òm noa heem te goa. Doaròm sopde me eene tump van eene tessjeplak in ee aelske en sjtook deze in de mòndj van dae kleene. Dae begòs aan de zakdook te zoeëge en vool i sjoap.

Went hae weer kikde, kreeg hae de tump weer èns in de aels gesopt. Wiej Luuk en Hoebert vreug in de oavend heem keeme, woar de ieësjte vroag va zieën vròw, diej Lieën hoosj: "Wat zeet g'r laat en woeë is 't kèndj?" Noa effe dènke, vool 't Luuk in dat 't kèndj nog bij Graetje op eene sjtool loog.

Lej Dohmen

Duuster

Wie kunt 't dat nog mar ée keuksjke uever is, Leentje?

Gisteroavend woare d'r nog twee i gen doeës.

't Woar gisteroavend zoë duuster dat ich 't anger keuksjke neet gezië han, mam.

Jan Halmans

Aa de nuët

Uëver d'r noeëteboom wil ich get vertille

De nuët zin riep, vier goa de weij va Campo binne

En da donge vier de nuët opraape

Die leete vier os da lekker sjmaake

En es ich da op sjoëël a koam

Waar 't mit de sjpas gedoan

Da moosjte vier bij meester Cortenraad komme

Nuj in de riej goa sjtoan es ee kolonne

En da de henj noa vuëre reeke

Doe woerd noa die henj gekieëke

De aafdruk va de nuët waar onoet wusjbaar

En doadoeër allenuj de sigaar

Resultaat veuël sjtroaf sjrieve

Cortenraad woosj os waal kleen te kriege

Jan van Haaf